

Salids dall'Engiadina a Glion e Breil

■ (anr/abc) La davosa fin d'jamna han rodund 35 cantaduras e cantadurs dalla Surselva purtau ils salids ell'Engiadina e concertau cun lur 35 cumpognas e cumpogns leuen. Ussa suonda la cunterviseta. Damaun sonda e dumengia concertescha il chor reunit cun 70 participontas e participonts a Glion ed a Breil. Ils concerts dalla sonda vargada a Scuol e la dumengia a Sogn Murezi han anflau buna accoglientscha. Ella baselgia gotica da s. Geer a Scuol han rodund 80 audituras ed auditurs tedlau in concert cun musica romantica. La dumengia allas 11.15 han ils chors reunit lu presentau il medem program ella baselgia neoroma-

na da s. Carli a Sogn Murezi Bogn. Igl ei stau in concert spirontamein vocal, senza clavazin ni auter accumpignament. A Sogn Murezi han rodund 150 persunas dau suatientscha agl invit. Chor Surselva & Cor Proget 18 ein s'uni aposta per quei project cun lur dirigents *Rest G. Tuor e Curdin Lansel*.

Suenter ils buns resuns a Sogn Murezi selegran ils 70 cantadurs e cantaduras da presentar en Surselva lur musica vocala romantica. Il program cuntegn ina buna mischeida dad ovras da cumponists dil 19avel tschentaner, ins astga guder Mendelssohn, Bruckner e Rheinberger. Dalla medema tempru ein las duas ovras

da Benedetg Dolf. Il chor Engiadina-Surselva entscheiva cun ina canzun dad el, denteren intonescha in dils dirigents il «Silbernes Flötenlied», ina cumposiziun poetica cun text da Martin Schmid. Canzuns dad Armon e Robert Cantieni, Nuot Vonmoos, *Gion Balzer Casanova* e Gion Antoni Derungs cumpleteschan il program e colligian las valladas romontschas dil nord e dil sid dil Grischun. Igl auditori astga selegrar sin in concert fetg melodius.

Ils concerts dil Chor Surselva & Cor Proget 18 ein sonda, ils 17-11 allas 20.00 ella claustra dallas soras dominicanas a Glion e dumengia, ils 18-11 allas 17.00 ella baselgia parochiala da Breil.